



Jumat, 15 Nopember 2024

Ogen: **Efesus 4:29**



Mbelasken Kata Si Erguna



Megati turah la siangkan i bas jabu erkiteken komunikasi si lenga tepat. Banci ka erkiteken la lit komunikasi. Jabu e ikataken la sehat adi la lit komunikasi si cukup subuk bapa, nande ras anak-anak. La lit cerita, la lit si nuriken isi pusuh, ras la lit si megiken ranan sada jabu. Banci tande mingguna la erkuan. Uga kin dage arusna?

Paulus ngajari perpulungen gelah melasken ranan si erguna, si banci nampati kalak sideban rikutken perluna, gelah kata-kata e maba kiniulin man si megisa. Jabu e me bagin i bas perpulungen. Jadi banci pedah Paulus enda pe seh ku jabu-jabu kalak Kristen. Bapa nande perlu ngerana, perlu nuriken isi pusuh, perlu megiken pasangan adi nuri-nuri. I bas megiken e, tutus, begiken seh ku isi pusuh pasangan e. Adi banci la padah kai pe kuit adi sanga megiken pasangan. Fokus ku bas kai si iturikenna, janah perdiatoken gerak tubuhna tupung ia nuri-nuri. Meriah entah sedih perasan pasangan e teridah arah gerak tubuhna.

I bas erbelas, pilihlah kata-kata si erguna. Kata-kata si banci mbagun semangat ras motivasi man pasangan. Kata-kata si erguna e banci ka mereken nasehat tapi la lit kesanna ngatur entah menggurui. Ieteh pasangan e muat kesimpulan arah kata-kata si ibelasken kita. La tondel ukurna sabap labo sitik pe ia isudutken, entah isalah-salahken. Jadi sada keriahen akapna sabap pasangenna e jadi teman curhatna.

Bage me perluna komunikasi, janah inget, jabu si rusur lit komunikasina nge si sehat. Jabu si lit i je canda ras tawa, lit je guro-guro, lit ingan nuri-nuri. Adi erdahin radu erdahin, tupung ngadi radu ngadi, janah i je kesempatan nuri-nuri.